

Furaha katika Bwana

Kutafakari kwangu na kuwe kutamu kwake; Mimi nitamfurahia Bwana—
Zaburi 104:34.

Jifurahishe mwenyewe kikamilifu mikononi mwa Yesu. Litafakari pendo Lake kuu na unapotafakari juu ya kujikana nafsi Kwake, juu ya kafara Yake isiyo kikomo iliyotolewa kwa ajili yetu ili kwamba tuweze kumwamini Yeye, moyo wako utajazwa na furaha takatifu, amani tulivu na upendo usioelezeka. Kadiri tunavyomzungumzia Yesu, tunavyomwita katika maombi, imani yetu kwamba ni Mwokozi wetu binafsi, atupendaye itaimarika na tabia Yake itazidi kupendeza zaidi na zaidi.... Tunaweza kufurahia karamu nyingi za upendo, na tunapoamini kikamilifu kwamba sisi ni Wake kwa kuasiliwa, tunaweza kuwa na mwonjo wa mbinguni.

Umngoje Bwana kwa imani. Bwana huivuta nafsi yetu katika maombi, na kutupa sisi kuhisi upendo Wake wa thamani. Tuna ukaribu na Yeye, na tunaweza kufanya ushirika mtamu na Yeye. Tunapata maoni tofauti ya wema na huruma Yake, na mioyo yetu inapondeka na kuyeyuka kwa kutafakari upendo ambao tumepewa. Hakika tunamhisi Kristo akaaye nafsini. Amani yetu ni kama mto, wimbi baada ya wimbi la utukufu hububujika moyoni na kwa kweli tunakunywa na Yesu na Yeye pamoja nasi.

Tuna mguso wa utambuzi wa upendo wa Mungu, na tunafurahia katika upendo Wake. Hakuna lugha inayoweza kuelezea, ni zaidi ya maarifa. Sisi ni wamoja na Kristo, maisha yetu yamefichwa pamoja na Kristo ndani ya Mungu. Tunao uthibitisho kwamba Yeye ambaye ni uzima wetu atakuja, kisha tutaenda pamoja Naye katika utukufu. Kwa ujasiri mkubwa, tunaweza kumwita Mungu Baba yetu. Tuwe tunaishi au tukifa, sisi ni wa Bwana. Roho Wake hutufanya kufanana na Yesu Kristo kwa tabia na mwenendo; na kisha tunamwakilisha Kristo kwa wengine. Wakati Kristo anapokaa ndani ya nafsi ukweli hauwezi kufichwa; kwa maana Yeye ni kama kisima cha maji, yakibubujisha uzima wa milele. Kile tunachoweza kufanya ni kuwakilisha mfano wa Kristo katika tabia zetu, na maneno yetu, mwenendo wetu, huzalisha ndani ya wengine upendo wa kina, wa kudumu, unaoongezeka kwa Yesu, na tunadhihirisha ... kwamba tumebadilika na kufanana na Yesu Kristo.